

四庫全書

集部

欽定四庫全書

集部

吳文正集卷八十五

御史<sub>臣</sub>邱文愷覆勘

武英殿纂修編修<sub>臣</sub>吳鼎燾

欽定四庫全書

吳文正集卷八十五

元 吳澄 撰

墓誌銘

金陵王居士墓誌銘

居士姓王氏其先自汴來南一徙再徙而家金陵諱進  
德字仁甫少孤奉母涂氏至孝上有四兄其一其四蚤  
世其二君祥其三君玉居士其五也勤苦自植趨時貿

遷道途不避寒暑嚴事其兄如父協力興家二兄既逝  
君祥之子曰子清君玉之子曰子淵子淳子澄母三分  
其產畀一子四孫異居異財居士所有浸浸以贏創立  
雖艱而振卹不吝三四十年間每遇饑歉施麴施米施  
鈔施粥日甚久數甚夥費甚不貲泰然行之如常每遇  
疫癘市善藥命良醫家至戶到隨證治療煮藥之器佐  
藥之用纖悉畢備病愈能食則啖以糜其所全活甚衆  
寒卧無以蓋覆者施楮衾貧死無以殯葬者施棺木公

府倘有勸率所出必倍他人親疏之族內外之姻周濟  
尤篤禮聘名師教子郡庠燬于火為構講堂高壯宏敞  
并其中陳設器具一新計緡錢七萬有奇皆獨力所辦  
買宅一區割田九頃荆建江東書院朝錫以額設官掌  
其教倣范文正公義莊規制以贍親屬城隍外門壞內  
屋敝運石于江而易其楹柱而修完其棟  
宇若此類布施不一固其餘事爾配于氏婉順溫惠孝  
其姑友其姒如居士之事母事兄父母之沒已多厯年

凡忌日及時祭夫婦哀感不異初喪寬厚謙和崇倫紀  
敦信義未嘗以貲富蓋長而驕貧傲少炎天獨處衣冠  
儼然見者竦肅病劇語言不亂神色不變天厯二年五  
月二十九日終年八十有四將以某年某月日合祔于  
氏宅兆前期來乞銘余客居士之家者屢知其篤行詳  
矣故為志而銘焉子男二子雲子霖也女六一先卒其  
孀徐應隆涂煥章呂元知趙良弼于德淵戚光孫男九  
女十三曾孫男三女六銘曰

篤行于身無怨惡于人噫訢訢噫恂恂噫疇之與倫

元故從仕郎婺源州判官致仕操君墓志銘

操君饒之浮梁人貴持名子敬字也宋贈朝奉大夫諱  
昇之之孫朝奉大夫太府寺丞知武岡軍諱斗祥之子  
寺丞公淳祐辛丑進士發身陞朝典郡諸子皆殖學績  
文稱為名家君其第五子也年十七以郡守之子試湖  
南轉運司貢禮部明年試入太學充弟子員皇元一天  
下奉親隱處至己丑十月父喪癸巳任安吉縣儒學教

諭大德丁酉進餘干州儒學正庚子遷溧陽州儒學正  
癸卯八月母安人張氏喪葬二親悉遵朱氏家禮例應  
部注教授內省為員多闕少檄外省凡五十以下再與  
學正山長之任理作教授月日丁未長信州路藍山書  
院至治辛酉勅授撫州路儒學教授壬戌四月至官越  
三年泰定甲子移疾致仕年未及不許力請再四乃得  
請丁卯勅授從仕郎婺源州判官致仕至順庚午五月  
己巳卒年七十四君教授撫州時余被旨趨京識君于

郡庠卒之年十有一月君之子希德喪服造吾門纍纍然戚戚然謂先君嘗獲一面去冬苦脾泄疾今春加劇正月猶彊出拜先祖考妣墓生平喜玩易善占筮四月辛丑筮疾遇乾之夬曰陽既亢矣其能久乎次月甲子再筮遇同人之乾畫卦訖默默斂策而卧自此絕筆越六日旦命舁就正寢屏女侍親友來省一一答之精神不亂問所欲言則曰無可言者日將晡憊然而逝不肖孤痛惟先君幼侍先祖宦遊涉歷世故備嘗艱險事父

母孝侍兄弟友厚睦族姻篤嗜文學質剛介務實踐不  
阿附不奔競見義必為取友必端淳任學官廉勤盡職  
引年早退日以教子若孫為急年逾七十考終歸全茲  
卜十有二月壬申安厝于嘉禾山諸孤無能顯揚深懼  
先德泯墜敢乞銘以示永遠噫余疇昔一見子敬固已  
嘉其敦謹今聞諸其子證吾所見尤信世胄而學不廢  
文儒而行不瑕其可銘也已君娶許繼方子男六希德  
希先希顏希仁希曾希元父命希先為季兄後希曾泰

定丙寅貢士女適朱適洪適李孫男若干銘曰  
言行恂恂質文彬彬不忝其先以啟其後人

廬陵張君材墓志銘

廬陵張君材名樸先世唐曲江公之苗裔宦轍所到留  
家吉之吉水後分置永豐割其所居之鄉隸焉大父宋  
進士易名元佐仕大元至承直郎婺源縣尹清謹慈愛  
民懷其惠然已意不愜官滿而止世父伯澄父伯濟聯  
中宋進士第一授分寧尉一授南康尉代革韜晦不仕

南康年七十二而壽而康君材其丕子也資稟英特博綜羣書吐辭成章敏健卓偉慷慨惆悵負濟世略儒業時務外文字聲音之形象寄譚鞫之語亦克旁究年十六郡守舉充歲貢年二十行省檄充樂安縣蒙古官學教官皆非所樂延祐甲寅科目取士出其素所長以應試一不偶即不肯再益志趣弗與流俗卑卑屑屑者同治生殖貨等事絲毫不塵襟抱前後郡邑正貳凡廉能公正之賢聞名起敬輒不以民伍視俯就問政必剖析

曲直可否以對聽者心服多所匡救嘗過余及見其詩  
余謂君材豈但以能詩名當以用世顯庀于命庀于時  
尺寸莫展年五十一而終憐才者憫之雖然藉令得一  
官未必可以舒其志則又孰若全所守之為愈終之日  
至順庚午九月丙戌死生之際凝定從容有高人達士  
之風娶南城尉羅致女子男四文豹文彪文虎文麓文  
虎奉尊者命為同宗後女四長適王前三年卒次適陳  
餘未行孫男女各一其年十一月乙巳葬石井箬塘之

原弟棣狀兄行畀文豹來徵銘銘曰

才氣軼羣既博且文俾引而伸不讓辛陳惜也隱淪翳  
天匪人

黃愚泉墓誌銘

故愚泉逸士黃君天麟名厚翁字也先世自豐城之沅江  
支分于清江之湛溪考諱應雷妣鄧氏宋咸淳辛未十  
月四日生元天歷戊辰六月四日卒生十有四年而二  
親逝伯兄督家及既異財或疑君未更事外侮潛窺君

應變如常家浸以饒田宅悉增其舊恩浹宗戚信洽鄉  
閭一言曉譬輒平人忿爭苟可利人雖勞力捐貲不吝  
里有麾塘儲水備旱甲午乙未間巨蟒穴堤堤壞水泄  
訛言見此蟒不死即病人莫敢前君率衆窒其穴蟒亦  
避去塘堤得完而水利復居當通衢夏月每虔製暑藥  
以飲行者平日又修它藥以施病者濟物為心大率類  
是該通陰陽歷數醫藥方技百家之學足迹遠涉江淮  
吳越而恬無干時意憲官問俗嘉君肥遯為書愚泉二

字獎之益以唐柳子厚之知而不用為比配徐氏前清  
江縣尹某之女子男以宏孫男陽生陽弟孫女長適徐  
洞宋兵部侍郎之曾孫也幼未行至順庚午十一月八  
日葬思賢鄉敏塘之原其妻黨徐鑑為之請銘銘曰  
既濯既濡潤後有餘斯泉不愚

元故榮祿大夫江西等處行中書省平章政事  
李公墓誌銘

公西夏賀蘭于彌部人也皇元資善大夫中書左丞贈

銀青榮祿大夫平章政事加贈推忠靖遠功臣太保儀  
同三司滕國武愍公恒之子益都淄萊軍民都達魯花  
赤贈金吾衛上將軍僉書樞密院事滕國忠襄公維忠  
之孫初天兵奄并諸國守夏邊城城陷死節者其先世  
也忠襄始仕我朝家于淄川從唐所賜夏國姓武愍遂  
為佐命混一功臣公諱世安字彥豪國言名散朮解憲  
宗朝癸丑歲九月五日生于宣德府龍門川人稱李龍  
川云武愍從丞相淮安忠武王平宋既取襄樊下荆岳

被命往定江西諸郡邑相繼降附無勞攻戰平反大獄  
全活故家百數征謀治法公之翊贊居多江西之民按  
堵如故武愍經略廣東授公金符朝列大夫廣州路達  
魯花赤辦軍需與宋師戰于海珠寺下公總千騎據岸  
發矢俘獲二百餘人奪取三百餘艘宋師舍舟陸走明  
年春克崖山武愍同張元帥入獻捷二帥分議水戰陸  
戰功賞議未畢而張帥沒旨令武愍并議之論定武愍  
由都元帥授資善大夫中書左丞出行湖廣省事公留

候命密院所擬中書每抑之公見執政言曰堅敵在前  
非有重賞何以得人死力張帥及吾父奉旨專賞罰生  
殺之柄今大功既成豈可失信不然此去再有征戰誰  
肯捐軀命哉執政乃從武愍所定以金符銀符畀公給  
散進階嘉議大夫新軍萬戶尋陞同知江西宣慰使後  
奉特旨世襲益都淄萊上萬戶至元二十一年武愍薨  
于交趾公護喪歸葬大都路宛平縣永安山之陽起復  
正議大夫僉江西等處行中書省事兼本軍萬戶二十

四年尚書省立公僉行省事如初有點僧託采藥為名至江西俾人誣告宋相章鑑匿故主國璽及親屬密旨命公提兵捕取公止用百卒猝至其家搜索無驗詰問告者首挾其誣章相得釋其僧撰造重大事名脅取富室貨寶不一公撫其事以聞權相右之事寢不報二十五年巨獠猖獗數道震撼重臣出討中路隕踣轉以委公卒底寧救信豐有寇公冒大雨夜行五十里黎明抵賊所賊方汲水朝舖出其不意殺戮殆盡軍回留騎數

百不給以食約五日而還騎兵掘食賊所害粟餘賊遁  
逃為飢窘求食而出悉捕斬之以殄寇功陞中奉大夫  
參知行尚書省政事二十七年寇黨復聚江西立行樞  
密院差官與公合力行省丞相止給軍三百大軍遷延  
不發而但移文督促賊衆兵寡不可前進公乃聲言修  
理橋道儲積糗糧以待大軍之集賊憚公威名比行院  
軍至一十七寨俱降既降復叛者令偏裨解青統官軍  
及降賊直擣其巢芟刈靡有遺類南豐廣昌賊繼起省

官職應勦捕托病而避復請公往公命弟萬戶世雄等偕首散民丁歸農決遣官軍出城屯駐令居民入城寧家官吏賤糴民粟圖利公責之曰汝不能弭寇又復厲民何以為民父母盡散其粟與復業之民移檄諭賊以禍福許其改過自新三日之間賊悉輸納其旗鼓兵仗公乃會聚其徒誅首惡六人餘悉賞罪被掠男女各付所屬完聚省長率僚佐舉酒賀曰真大丈夫也益以愧前之託疾避事者尚書省罷舊官盡革獨存公一人改

參行中書省既而參政徐公瑛公與協心剋除宿弊前  
時官差民戶典倉庫往往虧折填償以至破家乃咨內  
省擇府史代充至今便之三十年省院以所獲寇四百  
餘屬公涖殺公與都事周元德及行院官一一判別僅  
戮其二而已將征交趾公往廣州造戰船五百元貞大  
德間授正奉大夫參江浙河南二省秩滿陞湖廣左丞  
供劉平章西征饋餉溪洞險惡無木牛流馬可運率一  
斗粟數十倍其費始達人皆鬼域獸心重以饑饉瘴疫

公與役夫均其勞往復期年之上遠征士卒得不乏絕  
至大初召入加榮祿大夫平章政事商議樞密院使提  
調諸衛屯田仁皇居春宮領中書令樞密使既幸省府  
將幸樞府知公商議院事促令就職宴罷還宮撫勞公  
甚勤公素閱漢軍戍廣東瘴鄉十死七八至是建議擇  
善地分六戍鎮守有役然後調遣無事則安居戍兵免  
罹瘴毒得全其生皇慶元年錫內宴服金繡段金鞍轡  
弓箭白金等物日給公母太夫人尚醞一壺次年冬除

江西等處行中書省平章政事又次年夏賜玉帶自至  
元之末逮延祐之初江西二十有餘年無寇禍延祐二  
年寧都官吏經理田糧殘虐啟釁寇大作殺死州官軍  
官圍城至再省中同列詣公請曰非公孰能弭此變公  
以不兼提調兵馬之職非所當任懇請不已公乃移咨  
密院然後就道不兩月獲其渠魁禁戢用兵緩輯脅從  
罪誤之衆一如往年之于南豐廣昌平寇雋功此其四  
矣恩賚三珠虎符以賞功也三年公念太夫人王氏壽

將九十乞侍養得請七年丁太夫人憂扶襯合葬武愍公之墓服闋還江西至順元年十二月詔一品致政舊臣給全俸二年三月二十六日公以微疾薨天使來徵造朝而公薨已七日矣先是公參江浙河南二省時逮事忠襄公夫人武愍公夫人有子有孫一家五世文人鉅公作詩頌咏後忠襄夫人終公上事武愍夫人下見曾孫亦五世及武愍夫人終公年踰七十而公之長子翰林直學士中議大夫祀歸省已近六十鬚鬢皓白人

不辨其為父子亦復四世莫不羨公門積善之慶武愍  
生長邊陲飲食祭祀並遵國俗暨公之長務學友士誦  
習經史希古聖賢儀禮一書儒流鮮讀縱讀亦鮮達禮  
意公識高質厚值斬齊期功之服靡不暗合禮經居室  
之西營家廟祠武愍公物未薦新口不先嚙四時朔望  
率家人行禮雖晚年小疾未嘗使人代嘗至溜溜聚族  
戒曰此吾祖初基今族大蕃衍以溜川公視之豈容有  
親疏之異族人無子孫或孤弱客死遠方為歸其喪就

祖塋序昭穆以葬有義田供展省之費族之婚喪皆取  
給于斯在家燕處蕭然若韋布其出也騶從省約平生  
澹無所好惟延名師訓誨子孫勸人為善見有善若自  
已出聞有過輒為覆護勉仕宦以忠貞勉子弟以孝友  
貧約者勉其治生富厚者勉其施與飢寒之人衣之食  
之所識喪葬必躬往弔祭野有孀死捐貲掩骼一觔龍  
興郭外買地十餘畝貧無葬地者藏焉門生故吏位省  
臺官郡縣不可勝數若子若婿俱歷清要孫曾數十家

僮不啻萬指生之時雖行伍小校賤隸里巷兒童婦女咸知公名薨之日百司庶府以下人人驚惋公之子將祔公于考妣之兆貽書請銘澄江西人也知公父子之豐功盛德詳矣曷敢以老病辭公之配顏氏先四十八年卒張氏先三十年卒俱追封滕國夫人子男五此中議也嶼懷遠大將軍襲萬戶二十三年而卒巖棲霞縣達魯花赤峙亦先卒巖奉議大夫江西行省理問女一適典瑞院同僉紐里馬孫男十孫女四曾孫男六曾孫

女三公之弟世雄世顯公以本軍萬戶讓世雄授宣武將軍在職十年還以讓公之子嶼嶼臨終以讓宣武之子繁繁曰父讓而子奪之可乎不就職乃與公之嫡長孫保保以讓懷遠之子順武愍公之蔭讓與世顯初任湖南宣慰之貳繼任建康吉安瑞州三郡之監階昭勇大將軍中議武愍嫡長孫公之冢嗣也門蔭當襲固讓不受兄弟交相讓自公倡始而中議濟其美故一家雍睦之風他姓希有識者知李氏之昌未艾也銘曰

於維武愍活西江鮒抑有賢子克相名父禮敬遺老風  
動一隅當革而因如疾其蘇鼪鼯羣號公至屏息男耕  
女桑公所衣食西江之民淪浹公恩逮公之喪耳不忍  
聞公魄歸只公魂留只公兮弗留民之悲矣

故承務郎湖南嶺北道肅政廉訪司經歷范亨  
父墓誌銘

士之汎濫于虛文而忽略于實行也久矣波流茅靡之  
中有特立獨力者焉余惡乎不以東漢諸君子例之哉

清江范槁亨父一字德機家貧早孤母熊守義長而教之天資穎敏所讀誦輒記憶年未三十予識之于其鄉里富者之門雖介然清寒煢然孤獨而察其微有樹立志無苟賤意越數年漸漸著聲稱其處也苦節困窮竭力奉母其出也假陰陽之伎以給旅食其耽嗜于書鑽研于文用功數十倍于人人鮮或知也年三十六始客京師勲舊故家延致教其子藝能操趣綢繆中彪外流光浸浸以達中朝薦舉充翰林編修官官滿部注建昌路

照磨憲臺有聞名者改擢將仕佐郎海南海北道廉訪  
司知事不憚波濤之險瘴癘之毒巡歷遐僻每務興學  
明教民之抱冤官之受誣者一一存活申雪政譽上徹  
仍其所職遷江西湖東憲長嚴明于僚屬中獨異目視  
選充翰林應奉憲臺又改擢福建閩海道知事閩俗本  
汚而文繡局取良家子為閩工無別莫甚嫉之閩之作  
歌詩一篇具述其弊憲長采之以聞于朝緣是其弊遂  
革居十閱月會江浙行省禮請校進士文卷行至建寧

移疾竟歸託于外族而家在新喻之百丈山天厯二年授湖南嶺北道肅政廉訪司經歷以養親辭不赴其秩自湖廣行省校文而還逾月有母喪明年十月以疾終年五十九娶易先卒晚有子二人庶出也持身廉正涖官不可干以私疏食水飲泊如也為文雄健追慕先漢古近體詩尤工藹然忠臣孝子之情如杜子美又善大小篆漢晉隸書金谿士危素慕其風數從遊處未終前兩月往哭其母時疾已劇尙羸骨立謂素曰世道之卑

士氣之陋甚矣子其勉諸吾殆將死已而果然素哀其  
卓犖大節浮沉下僚又不獲中壽其子長者甫七歲幼  
者甫四歲懼其湮沒無傳乃撫其事行徵予撰銘將與  
龍虎山道士薛玄義買石勒諸其墓嗚呼享父誠特立  
獨行人也而素之高義亦薄俗所稀范之詩文有燕然  
稿東方稿海康稿豫章稿候官稿江夏稿百文稿總十  
二卷銘曰

介潔之行瑰瑋之文而止于斯也來世倘有聞乎噫

吳文正集卷八十五

欽定四庫全書

吳文正集卷八十六

元 吳澄 撰

墓誌銘

故處士季德吳君墓誌銘

青雲鄉吳季德少予一歲同姓也同縣也其子任數及  
吾門泰定丁卯秋季德訪予于上方觀越二年余八十  
一初春以詩來余和其詩以往將期永久叙兄弟之好

而是年夏李德死矣噫顧言斲余志葬志曰崇仁之吳甚盛而不一族青雲之吳先世盱人主崇仁簿壻于其鄉而家焉在宋淳熙間丁酉庚子癸卯如山如陵禮翼續續預進士貢方叔嘉熙戊戌補入太學淳祐乙巳優等釋褐由是其族之文聲大振彬彬應舉林林授徒至今不乏其人季德厚倫紀篤恩義施于內外族親足以敦勵薄俗又非止文辭句讀之長而已宋祚訖儒科廢猶以舊舉業訓子逮延祐復行取士制子若孫皆能試

藝若前知然曾大考天麒大考表臣考子能俱不仕嬪  
樂安熊氏子任和輔中子以後從弟孫男六尚秀祿向瑜  
增六女四曾孫男立一家四世藹然詩書禮義之流風  
季德名德夫若陰陽家小伎若卜日若卜宅若推人生  
休咎靡不旁究允為通儒矣哉卒以天厯己巳四月辛  
丑葬以至順壬申正月丙寅其兆黃栢坑之原左距先  
嬪墓數百步銘曰

驟獻璞弗售儲以須其胃

從仕郎瑞州路高安縣尹嚴君墓誌銘

嚴自東漢避諱而得姓蜀之遵富春之光肥遯高蹈名  
耀百世託易而諭臣子忠孝之道于衆者遵也雖不言  
易而明屈伸進退之道于獨者光也宋之季有吉太和  
嚴氏進易解余及見其書其辭達官之以祕書省校勘  
而亦不仕余因歎當時專門治易義應舉覓官之士其  
于易也深之為精蘊固鮮究竟淺之為文義亦或迷昧  
然亦以之擢高科登顯位往往有焉非藉易以徼利祿

而能沈潛玩繹為孤寒之所不能為余是以善嚴氏之書而賢其人爰逮國朝又聞私牋義塾教養宗族鄉黨之子弟方時務搶攘轆轤之會人人自救不給于斯之時暇豫從容作此義事問之知為祕書之家益歎其不墜文獻之流風越數年余承乏禁林或持高安縣尹嚴君行狀示余讀之則祕書之子義塾之主也予既辭官歸而高安之孫奉父命因余之孫當請為君銘墓時君已葬矣余素聞其再世之德美乃為追述而銘之太和

之嚴蓋自馮翊徙又自金陵徙至朝奉郎潮州通守康  
元之弟保義郎淮東制屬光庭生知古知古生起予起  
予生祕書肅高安祕書仲子也諱某後以字行曰用父  
嚴氏資力敵古侯伯不驕盈不豪縱慈良謙約自奉如  
貧儒唯祭祀賓客必致豐盛容貌光澤聲音洪暢志氣  
清明靡暫偷惰自少至老必昧爽而起衣冠待旦端坐  
終日傳習家學手抄父書鋟木諸家易注旁通融貫處  
常處變趨避曲當自著易說發揮三卷餘力兼覽華嚴

經法華道德黃庭等書州南門外懷仁渡當大江之衝  
渡者日以萬計嘗覆舟溺人由是慨然動拯溺之思龍  
灣中河二水合流迅駛捲激春漲尤暴舊橋低壓乃于  
橋側別築基址高廣數倍通三大渠以殺水勢橋南築  
堤百餘丈以達于渡雖屢潰決不憚勞費補塞迄底于  
成渡近荒洲彌望每風雨無所于庇爭渡者多溺鳩工  
畚土於洲之左右築為平坡建雲江觀掌以道流建妙  
法堂掌以僧徒各施田以贍其衣食種樹成林環二里

許水漲及大風雨待渡者皆得往依有所休息宋之將  
亡南安陳侍御上封事觸牾時宰斥逐去國客寄嚴氏  
屢期一旦委行橐而別莫知所終在後其子入南一一  
計橐中所直償之其子力辭強之使受有僧兵間失母  
求之徧天下幸知所在其人官于太和貪忍特甚懇求  
弗獲君出金為贖其母僧大感悅有奴被悍卒奪取其  
所攜主家金釵將欲赴水死君策馬追及悍卒得釵還  
奴以錢二千與卒卒亦欣謝施藥而醫所不能醫施棺

而葬所不能葬收養貧家遺棄之兒賑粟平糶以活飢  
造船成梁以利涉似此輕財重義之事不一當路薦授  
從仕郎瑞州路高安縣尹兼勸農事不赴初祕書君之  
喪未葬而代遷風塵四起倉卒護柩出殯時平安厝如  
禮新民不諳新政舊家束手待盡獨君才優識敏應接  
得宜黠吏狂胥震服不敢慢侮又言之有司斷絕其根  
株俾不肆毒閭里于是居者如鴻歸蟄啟始得所安君  
時方強壯閱歷又幾五十載至治壬戌四月既望以疾

卒壽八十有五涉世久故德之及人也深遠近聞喪相遇于道者皆失色相語于家者皆流涕望門而嗚咽不勝及門而號痛欲絕者日數十百嗚呼其何以得此于人哉卒之年十月九日葬萬安縣永和鄉龍邱之原君先後凡五娶子男三寅翁仁翁辰翁女二孫男八女五曾孫男女十有五銘曰

余觀漢儒之傳經也或世其業弗世其德高安世守易學無晦吝于時有慶譽于身元永貞于其家矣夫善用

易者哉

故逸士袁君脩德墓誌銘

吾家臨川山之陽華蓋山之陰距邑百里郡二百里深山之野人也由吾家而南逾一嶺又二十里許山彌稠地彌僻袁氏居焉有竹逸翁者溫然如春粹然如玉藹然王謝家氣象略無質勝之偏豈其得于天者異與蓋翁乃邑中先達嘉定辛未進士客管安撫陳侯諱元晉之甥少就舅家習學故其身容意度隨所居所養而移

其齒吾父行也余自視若諸子而翁忘年折行相與如  
友噫賢矣哉逸士翁弟之子也諱弘道字脩德父諱景  
鳳母方氏夙喪其父長養而教訓之辭翰之純雅儀象  
之安詳儼然不失世父之規矚謀慮謹審踐履平實接  
物和易值運代革鄰寇乘時暴擾逃竄靡寧奉母經紀  
資裝嫁遣姊妹五人年三十母又喪戶役繁重生業幾  
損其半草竊猶未靖至元庚寅來依外舅陳居士客寓  
八年勤苦節縮浸浸復其所損大德丁酉乃遷故里已

酉新構于舊基屋東朔齋廬如舟名以月舫程承旨書  
其顏自是足迹鮮到城市幅巾褒衣危坐終日或覽經  
史或覽詩文事有嬰觸善以理遣喜怒不形與人語惟  
恐激傷對客無倦情天厯己巳四月會飲酒闌微疾翌  
日辛巳晚體力漸弱至夜分而終年七十一生平處已  
謙虛事世父如事父恭兄友弟族無間言撫孤甥待外  
姓幼穉情誼俱敦篤鄉閭稱為長厚及聞其喪莫不惋  
惜至順辛未七月癸卯晦葬上坑先塋之右子時敏時

啟時攷啟先逝孫男七女六昔延祐己未其配陳氏卒  
余為志其葬今葬逸士其孤復徵余銘逸士猶余異姓  
弟故不辭諱景麟者竹逸翁也銘曰

無怨惡於人無愧忤于天宰木欣欣宿草芊芊德人藏焉

有元承事郎吉安路同知太和州事羅朋墓銘  
皇元貢舉取士已來天厯己巳第六科矣吾鄉羅朋中  
鄉試第二次年庚午春會試第四十八御試第七以進  
士出身授承事郎吉安路同知太和州事賜第七品緋

服時年三十四父母俱未老若宗族若親戚若儕輩若  
黨里咸榮之其還也在路已微疾留洪辰再浹疾小愈  
乃抵家至順辛未冬太和迓吏促赴官疾雖不大作醫  
屢更藥屢試終不脫體弗克往壬申正月望竟不起豈  
但父母哀之哉宗族哀之親戚哀之儕輩哀之黨里哀  
之而余之哀之也有加焉蓋余事其祖孟俊父猶吾兄  
視其父艮猶吾子而朋猶吾孫也朋之既擢科也是與  
余孫畚同舟而南畚于去年八月五日遭母喪十有一

月十有八日毀瘠卒中二十有四日死朋聞之甚戚甫  
再逾月亦相尋而逝嗚呼哀矣哉余之哀所以加于人  
也夫孟俊父諱愷體貌軒昂意氣慷慨剛果而樂為善  
不與碌碌腐儒等南土新附徭役不均中下戶有所不  
堪而生業墮良才勝幹蠱家復興得內助力嚴于教子  
子遂成名前代此鄉之始登科者侍郎李公後百二十  
三年朋為今代儒科之首居之相近一二里羅氏積善  
三世而肇慶于今衆人之所期望果何如而遽止于斯

邪嗚呼哀矣哉朋娶李男二曰方曰立女一日夕弟端  
傳兄遺命請志葬嗚呼哀矣哉庸詎能文之以文乎友  
道朋之字也予大者其父之字也銘曰  
成之孔艱毀也孔棘天胡爾慳疇不哀惜

有元同知茂州事葉君墓誌銘

延祐戊午進士李君槃初事丞撫之崇仁余所善者今  
尹南康之星子狀其鄉人葉君之行請為銘其葬余于  
葉不相知而李則相知也因所知以知其所不知銘其

可按狀葉君饒之樂平人其先由新安徙大榮其名芳榮字也父處士君諱以仁母項氏繼胡氏處士三子仲出後它姓君其季也九歲失母哀慟不食異于常兒處士壯歲已謝事析其產畀二子值官有賦金之令期集賦金戶于金陵君遠遠遊處士將自應徵呼伯子請代弗許固請乃聽其往未幾君還家父語之曰汝在可代吾行汝兄行矣君聞父言疾馳而赴至則其兄有病危篤君抱扶欬歔兄曰弟若來遲吾其殆哉君入奉湯藥

出應公役兄之病瘵遄東其舟君畢事而歸白其父復  
合所析之產一切代兄任勞而不私其財竭力應門貽  
父兄以逸金場日負畚鍤求金無可得吏並緣漁獵民  
不勝苦君具陳其害有司以聞竟罷其場先是驗田租  
賦金歲久力疲賦額如故州長圖救其敝以富補貧富  
戶相率上訴君獨持不可曰吾非欲多納金顧征賦自  
土地出有田之家不納今無田者虛納安乎贊成州長  
所行貧戶德之富者有怨言弗恤也延祐經理官吏務

增民糧以希功賞君所居寄產戶糧多土著戶糧少外處浮寄之糧敷派其數于本處實有之田增加不啻三倍君百計根索舊籍糧額可憑者辨明于官仍自捐重貲賂吏本土之民免受虛增之糧君之惠也初樂平以縣陞州君歎曰此小邑今為州用物弘矣如民困何一州佐稍知學君勸之以學道愛人之意既而有二州官各挾其能大妨于政君又調劑其間二官遂睦政適于平民得以寧李君叙君之行云爾又謂君忠直裨于官

府惠愛暨于鄉黨信以交朋友安以遺子孫服父喪無  
違禮事後母無間言天資近道有得于孝弟李君名進  
士其言蓋實也特旨授君同知茂州事以年老不赴生  
于宋景定壬戌正月沒于元泰定丙寅正月某年月日  
以其配徐氏合葬于某原徐之事舅姑得婦道內事無  
不理先一年卒子男四長國裕嘗遊京師為中朝一二  
鉅公所許與次也先湖廣行省知印先三年卒次真國  
學生幼者為人後亦卒女一適夏昇孫男四女四銘曰

善為子善為弟才足以保其家惜哉不得以用于世

元故都目龔國祥墓誌銘

龔都目國祥偕其配徐氏將以至順三年三月壬午寔  
于臨川縣臨汝鄉之九里岡其季子紳承諸兄之命來  
乞銘曰先父諱天瑞洪之豐城人洪今龍興路豐城今  
富州也吾祖而上世為宋吏吾父際皇元混一之盛獲  
登平章李公之門以有時才從事二郡由撫而吉吏員  
考滿陞府史之首領初治郡之臨川縣再治贛之寧都

州繼任天臨路茶提舉司都目適紳之伯兄芾天厯戊辰八月歿于瓊訃至吾父哀傷得疾是年十二月甲辰終于寓舍明年春紳侍兄紼奉柩以歸淺殯未葬今年正月癸未吾母亦終乃合葬焉昔吾祖諱彬壽八十歲予大母朱氏之姪是為吾父幼讀書強記長習律試吏謹于持身寬于待人恪于奉公所歷靡有瑕玷衆中簡默不銜不矜俾當繁劇如利斧斷枯朽其吏于撫僧寺被刼盜獄有疑白于上官而盜免于麗極刑其吏于吉

也或誣民為軍官府不敢決聞于行省而民免于隸軍籍治臨川時經理田糧之政棘分縣之諸鄉為四與長貳各專其一寧受譴責于上而不忍逼迫于下事亦終辦有僧溺死辨其無異故聽衆僧以之歸葬法吏吹毛疏駁據理具析竟莫能屈治寧都時閱公帑得勸分羨餘之幣計緡錢二千七百有奇請于州長市白金作公用酒器及丹漆竹木等器衾褥帷帳等物自後凡遇公府宴集來使宿止器皿設飭備具不復如前私假徧擾

于民豪橫聚黨爭占官塲狼鬪傷人官吏畏避吾父  
獨為受行明徵其罪犯者計窮莫夜致賂麾之門外彼  
遂移賄他官改委推問值省臺審錄冤滯從吾父所覈  
初情潭之茗局貪縱特甚吾父諷勸同僚極力匡救會  
有詔革其司而吾父亦捐館矣仕撫樂其風土買前代  
侍從管氏張氏之屋而居庭有五桂翰林虞學士扁曰  
桂堂而記之吾父生宋景定壬戌八月戊子享年七十  
一紳之兄弟五弟海南海北道元帥府奏差攝瓊山令

其次端也冕也紘也紳也吾父有孫七履為長孫女亦  
七余識國祥也舊世吏而有士行貌言藹藹如吾徒氣  
和意廣歡如也谿如也用未稱其才惜哉銘曰

時之所才時之所用用之者輕才則堪重才之以獲用  
則聲種九里有原永嘒斯壟噫嘻

金谿洪君士良故妻張氏墓誌銘

金谿洪君士良妻張氏名妙清賢婦人也生宋景定辛  
酉年十六歸洪時南土初附新政如蜩洪君盛年膺門

晨夕公府內事得助家用以興怡舅姑友娣姒夫家兄弟同爨二十年雍睦如一日後娣婦喪撫夫之從子如己子愛夫之庶子如己出長育冠昏其諸孫與諸子同好善樂施值大德丙午歲饑發倉篋所貯賑飢周急貸弗克償者弗責天厯庚午歲復飢周賑亦如之戚姻鄰亞雖童孺媼嫗靡不懷惠心量寬和身教嚴肅夫或觸事嬰衷必曲為開釋見其解顏而後止夫或被子拂意必詳致戒飭見其從命而後喜諸子或督廝役之愆亦

必諄諭恕宥下而娛勝待之甚恩至順辛未十有一月  
廿有三日呼諸子諸孫至前囑以勤學孝敬父母令左  
右扶掖坐而逝卒之明年九月甲申葬于里之梅方洪  
君命男璋來請志其葬乃因其所稱叙而銘焉男四璋  
同泰槐璋歷袁宜春江瑞昌二縣學官同槐孳也女五  
適禮原余新田吳南城周柱田吳季在室孫男四鈞鍾  
鎰鏞孫女一余于延祐丁巳春往拜陸先生墓託宿洪  
館洪方偕一二士構陸祠余固異其家有禮義遺風今

而知其外內俱賢也張氏石門著族曾祖元用祖文懋父德榮俱不仕銘曰  
助之賢慶之延信其然

故臨川逸士于君玉汝甫妻張氏墓誌銘

余足跡不至城市十年至順壬申夏就子之養而至焉  
問士于所知或言于珪工進士業既而有一二客來過  
叩其業頗習叩其自曰自于乃信言者之言信其年九  
月珪衣大布之衣即余寓坐定戚然而請曰珪老母不  
幸于庚午十有一月辛巳終且三年矣始得葬地在臨

川縣長樂鄉金山之原寔有日幸憐而賜之銘余閱其所錄珪母張氏女文安陸子門人宋先生復之外孫也有婦德能為里中女子說禮記內則曹大家女戒常以明經勗其子余願珪深思毋訓行聖賢之道立身揚名以顯其親勿徒以進士之經學為學也進士之治經吾朱子以為經之賊文之妖今之文格雖比宋末微異然亦卑卑淺陋之甚曾是之謂明經乎羣試有司攫取一官曾是之謂顯親乎余每慨臨川金谿之士口有言輒

尊陸子及訊其底裏茫然不知陸子之學為何如雖當時高弟門人往往多有實行蓋未有一人能得陸子心法者以學之孤絕而無傳怖矣哉余之接人非一而鮮嘗以是告之何也度其必不以余言為然也苟不以余言為然而與之言余失言矣珪之所自出固已涉陸門之津涯而珪之質淳謹篤厚可與進道余不與珪焉語而誰語珪母諱壽玉生宋淳祐丁未六月戊子享年八十有四珪父諱成字玉汝為張之贛壻先廿有二年卒

男一女一適吳遠孫男慙曾孫男應銘曰

母識孔卓期子宏廓伊誰云學鄉有先覺

撫州路陰陽學正彭從龍故妻徐氏墓誌銘

臨川長安鄉禮林彭從龍之妻徐氏妙英至順三年五月辛未朏卒年六十五其仲子以昭持前南康路儒學教授婁志淳狀介鄧晉王遠來見乞志其母之葬謹按狀徐世居臨川新豐之黃銅歸彭事舅姑相其夫喪祭克順克敬聲柔氣和喜怒不形與妯娌同處四十餘歲

日相歡聚奉之若母待夫之族一一無間言或假資服  
賈及歸任其所償不校本外之子曰朋友且通財況子  
姪乎于內外使令輩辭色亦未嘗厲黨里嘉凶之事隨  
力而助家雖饒躬執女功不急子既冠既娶猶勗其學  
晚節頗信浮屠法徵福利夫將遊燕欲以家事分畀諸  
子則告其夫曰嫡庶均吾子折生業宜如一彭君泰定  
甲子歲受司天監檄充撫州路陰陽學正子男三長以  
正建昌路醫學錄仲以昭臨汝書院直學季以成及女

一庶出也女適姚孫男八洙也鐵也泰也文也達也升也閏也求也女七長適趙其二許適吳其三許適楊餘未字擬某年月日葬某原以昭汲汲得銘孝可尚已乃為銘銘曰

夫優妻柔母教子孝維家之休

元故金溪劉君國祥甫妻鄧氏墓誌銘

劉君國祥甫名天麒再娶鄧氏元贈忠翊校尉同知建昌州子茂之女忠顯校尉同知吉水州希顏之女弟也

名懿惠宋寶祐丙辰三月生年三十九歸于劉劉君初  
配余有二男一女俱幼撫育教誨若已出平居無事足  
迹不下堂未嘗疾聲厲色服勤蠶績恒達旦不寐皇慶  
初劉君沒委家政于諸子身無所畜藏人問之曰凡殖  
貨者將以給用諸子既能養奚以此為老年起處欲自  
適私儲徒增累爾至順壬申八月壬寅以疾終年七十  
七男三長迪祿仲載陽叔立大仲先卒女二一適王一  
適鄧孫男八孫女八次年癸酉正月壬申葬里之新庄

距家甚邇余與忠顯鄧君交誼如兄弟忠顯之子謙導其姑之子立大來乞銘是以不得辭焉銘曰

少從父稱賢女長從夫稱賢婦老從子稱賢母其可銘已



吳文正集卷八十六

欽定四庫全書

集部

吳文正集卷八十七至九

御史<sub>臣</sub>邱文愷覆勘

武英殿纂修編修<sub>臣</sub>吳鼎震

欽定四庫全書

吳文正集卷八十七

元 吳澄 撰

墓志銘

有元奉訓大夫南雄路總管府經歷譚君墓志

銘

壬申

經歷譚奉訓吾故人子也平江路常熟州儒學教授李仲謀以狀叙其世系行事曰君諱適字立之以字行其

先蓋以國氏其居撫之宜黃邱隴可考者十一世曾祖  
諱伯言祖諱用川在宋官皆從事郎父諱文森宋貢士  
皇元授奉訓大夫温州路總管府治中歷同知武岡路  
總管府事廣東道提刑按察副使福建道儒學提舉江  
西等處儒學提舉官至奉政大夫君其仲子也讀書有  
志趣侍親官于閩學國字宦學蘓字擢江南行御史臺  
譯史不赴父喪服闋遊京師至大庚戌尚書省鑄新錢  
以才選授將仕佐郎江東等處坑冶副提舉君博覽襟

志夙諳鼓鑄之法召工潰鐵于池即成銅烹鍊功多利  
悉送官錢監廢君歸隱其後再遊京師至治癸亥充司  
徒府掾天厯戊辰遷集賢掾史及代宜得隨朝正七品  
職以去家久丐外得奉訓大夫南雄路總管府經歷至  
順辛未夏南還舟次龍舒六月驟暑感疾越一日癸丑  
歿於舟中君天資簡重沈默謹然諾人莫測其涯涘旅  
食十餘年處之若素貧賤者賢矣哉生至元辛巳六月  
己丑年五十一娶徐氏子男一京生女五適夏適胡適

蔣餘在室歿之明年京生持狀來請曰先君平生艱勤  
壽不逮祿將以某年月日葬某原不肖孤懼其泯沒無  
聞倘惠篤世契而畀之銘以光於幽宮則先君雖亡如  
存也予於奉政公長一歲相與猶兄弟見其子之能卓  
立則喜今見其不得壽寧不戚然乎銘惡可辭銘曰  
粹溫如玉可琰可珣天奪之速云何不淑

故修江鄭君朝舉墓志銘

修江故建昌縣令陞隸南康路君鄭氏翔名朝舉字也

考諱有慶妣余氏生宋寶祐癸丑十月戊午年踰幼學  
端重如成人習唐歐陽率更楷法宋高廟行草俱逼真  
登鄉達呂侯正甫之門從行倅撫郡呂之父朱子門人  
也君熏染見聞嗜小學四書歲乙亥避地道遇遊騎被  
掠僅以二親脫走猶携小學四書宋名臣言行錄自隨  
夫婦躬爨奉養于艱棘中國朝既定南土歸隱屢間值  
各處盜起郡貳至邑俾令長集父老議選有才望者往  
撫諭僉謂君可君承命挾二力直抵諸山砦曉譬禍福

悉改悔釋兵郡貳器之擬署郡從事弗就其後為養黽  
俛食庶人在官之祿非其好也居家事親承思先意無  
毫髮違弗事兄如嚴父靡或相猶親癢輒不御酒肉停  
公務拜醫進藥日夜不離左右父嘗得瞽疾又嘗得末  
疾沉痾危篤均為難療君竭心籲神二疾咸愈人謂孝  
誠所感持喪致哀服闋猶不忍出薦奠追慕終身不少  
替邑之令長鄉之耆父數百人詣郡舉其孝行有江西  
茶運使素相知辟充掾史同儕獻言稅青苻以增課額

君力爭竟沮其計省檄長府史中使經歷田糧君多方  
救護民免加賦之害省府括民為匠累累上陳其不便  
事亦中止遷茶司幕僚在職未幾以老謝去君每疏聖  
賢格言於屏朝夕目之以省厥躬嘗訓諸子曰議昏當  
擇良配吾幸汝母惠淑事舅姑尤謹故不陷於不孝二  
子仕外有使通問必緘示誨言勗以清慎君與人交必  
恭必信翼善規過不毀不譽親黨有喪不舉已雖屢空  
助之不靳撫孤賑急汲汲恐後年躋八袞聽視聰明髭

髮才斑白子時中憲掾秩滿授將仕佐郎江州路總管府屬官既代擢江西省掾方喜近家遂迎養之樂至順壬申十有一月戊辰肱君以微疾終矣娶余氏先二十二年卒子男四一中蚤世時中道中德中亦由廣西憲掾類吏部選女五一適丁孫男十二女七一適閔曾孫男一女一將葬州治西北天津山先塋之近時中以江州路儒學正袁梅瑞之狀來乞銘昔宋咸淳辛未以鄉貢試禮部不中其冬客郡倅館下月餘與君同處呂門

又識君之子是以不辭而銘君之墓銘曰

孝行之卓君所優污行之惡君所羞之仁之義鮮與傳  
斯銘斯志千古留

故池州路貴池縣尹致仕徐君墓碣銘

君姓徐氏其先由豫章徙撫宜黃之澗溪考諱德秀避  
亂居郡城君少字奇伯中歲以字行更字長公與予同  
生宋淳祐己酉月日後於余工進士詩賦其藝可貢而  
屢試不偶宋亡在家講授元至元甲午當路舉充建昌

路南城縣教就陞撫州路臨汝書院長再調長江州路  
景星書院行省工姓名于朝厠教官選內大德癸卯春  
至京師曰吾獲與天下英俊遊志願畢矣端歸以造就  
後進為務從學者彌衆至大庚戌部注將仕佐郎臨江  
路新淦州儒學教授留淦五年延祐戊午換注撫州路  
金谿縣主簿任未滿引年去位泰定甲子七月十三日  
乙酉以疾終明年授承事郎池州路貴池縣尹致仕命  
下不及拜矣君事母致孝喪母致哀叔父鰥貧迎養于

家奉之猶父女兄守孀弟麟先逝極力扶持之撫存孤  
甥教育從子一如己之子為文條達平瞻善談論與人  
交恭謹端恪而不矯激四典教職振起士學修完黌宇  
有勤無惰有興無廢嘗攝新淦州事決難決之訟化難  
化之民衆庶咸說曰教授權州半月治效若此倘使專  
司民社又當何如逮主金谿縣簿邑宰廉能忻得儒佐  
初娶符繼娶晏男中立廣東元帥府掾前六年喪中益  
陰授征官女適李孫男士原士清士淵士觀孫女一適

吳二三俱幼卒之年八月十九日庚申葬長安鄉余道之原越九年其孫始以南康路儒學教授妻志淳狀來乞銘吁銘已後矣乃為書此碑碣于墓銘曰

予之齊年如君者稀後我而來先我而去嗚呼噫嘻

故宋鄉貢士金溪于君墓碣銘

金溪于君諱應雷字震卿暨澄同預宋咸淳庚午秋貢進士君長七歲予兄事之明年試禮部俱罷各退處僻陋一在郡之東一在郡之西南相去遙隔重會孔艱迹

若疏曠心常親厚也君少治舉子詩賦論策超越輩流  
同里曾縣令先達先覺負重名為學者師奇君之才女  
馬運代既更學行彌高稟氣剛直寡合不阿雖隣家無  
事未嘗一至倘至莫不歡迎交友尤不苟安貧固守薪  
米屢空畧不屈挫得一美味必持奉二親過從當飯而  
飯當宿而宿蔬食菜羹對客共食泰然無愧誨人家子  
弟諄諄善誘成才者甚衆所作文章義正辭嚴字畫道  
勁類其為人儲書數千卷下逮陰陽伎術等書亦或手

抄惟不喜二氏曰生民之害大矣吾忍觀之哉隱于五  
雲山之近自稱五雲山人云年躋耄耄康強不減少壯  
生宋淳祐壬寅十月己巳終大元至順辛未九月辛丑  
其年十月庚申祔葬考府君之兆配曾氏諱季藻淳安  
長女也先一年卒男三長時保少廣同蚤世惟中子廣  
在女三長適鄭大益先九年卒少適余岳先十四年卒  
惟中女適汪士規者在孫男四瑱琥珪玘孫女二一適  
曾伯堅一適余鼎明壬申夏澄自家來憇郡城廣具君

之行與事請銘噫銘而附於棺乎弗及已乃追銘之以  
碣于墓銘曰

其文金玉其質石鐵九十而終全士之節

故將仕佐郎贛州路儒學教授陳君墓碣銘

君諱先得字辰翁居吉太和之城西世為里著姓蚤歲  
應進士舉不偶代革科廢以其餘力為詩冲澹絕去雕  
飾陋巷數椽僅蔽風雨隙地蒔梅一株菊數本家人憂  
其不事生產作業無以遺後則指架上書曰此吾子孫

無窮受用年踰四十始出遊歷數縣教官又以憲司選  
試中程遷贛郡學錄年將六十學官入仕制始定既而  
奉江西行省檄教諭興國及贛二縣陞長瑞州路西澗  
書院任滿名上中書部注將仕佐郎贛州路儒學教授  
致仕明年泰定丁卯二月十八日終于家年八十四君  
外無貪求內無忌克人之戚戚然如已戚人之休愉然  
如已休朋游燕坐言談肅不聞聲及有是非利害厲辭  
面折見其心服即懇款如初暇輒悠然獨行行而適然

相聚聚而歡然以飲飲而恍然以醉醉而嗒然以睡睡而忽然以醒物我兩忘處家處旅一若是陶陶焉莫年次子更其宅寬衍十倍君曰汝大吾家在德器不在屋室人若期稱所願豈有足焉曾大父以醫馳名君亦兼通其術予藥濟貧不倦配曾氏子男二學詩韶州路乳原縣儒學教諭學禮承事郎贛州路瑞金縣尹女一壻蕭秀實孫男三以道南雄路始興縣儒學教諭文子潮州路韓山書院山長新子其季曾孫男四曾敏鼎祖葬

于州之雲停鄉祔母嚴夫人墓側學禮命文子自潮來  
索銘時君歿已六年矣閱其請之勤故追銘之銘曰  
其進其止任運適已子孝孫慈俱以儒仕

故臨川處士陳君墓碣銘

臨川東鄉之古原陳氏居焉處士君字瑜玉諱瑜生宋  
淳祐己酉九月望年八十一元天曆己巳九月望以微  
疾終于家明年至順庚午十二月庚申葬東原其鄉人  
饒宗魯述其行導其子來求文文墓石予按所述君之

六世祖策贈朝奉大夫二子長子孺紹興戊辰進士第  
三人官至朝奉大夫直顯謨閣湖北安撫幼子邦慶生  
公著君之高祖也曾祖治原祖世則考師文俱不仕君  
端慤敏惠少學舉子業藝成而科廢所居深邃四山傍  
圍一溪縈帶鬱然桑麻如古桃源然濱于越界南土初  
附遐陬未靖寇震于鄰賴君有謀寇不敢犯其後官軍  
捕逐幾受玉石俱焚之禍君造于師竭家財迎犒保任  
其鄉為良民帥義其請禁毋俘掠一鄉生聚獲全君

之力也至今父老猶感恩不忘遇賢士挈家逃避為寇  
所得貧無貲奉將致之死君捐金贖其孥而無德色臨  
川大邑每歲輸糧三萬有奇吏漫其籍官與民兩病會  
郭尹至君先自首實又為畫計考覈尹行其言未期籍  
成君早年罹世艱棘處劇而裕謹慎而不墨於過無厲  
聲厲容偏好偏惡人有爭較君為諭釋辭氣溫和無不  
感動悅服撫家庭人從卑幼教愛兼備與人交傾倒坦  
易鄉評所歸遇事而斷不苟下於人歲饑周賑如常惠

利出於無心體貌嚴重衣冠肅潔微髯頰頰神意灑落  
步速如流炯炯精悍閒暇自得有文獻大雅遺風喜玩  
佳山水常意行規樂邱莫年與鄉之耆壽宿望尊酒吟  
詩昆弟翕具其樂無涯既歿人咸思之哀之而無怨議  
配楊氏先十年卒男五福鉅銘鑒釭其二以後伯兄琇  
其三以後季弟璉女一壻王昭祖孫男十人溢演溥溥  
浩源澄潤深洪孫女四曾孫男六相武周觀椿桂曾孫  
女四饒宗魯曰士之能世其家者鮮矣昔陳太邱長其

子為卿其孫為公榮名非不足而公慙於卿卿慙於長  
吾里衣冠舊族惟古原之陳自朝奉公以來七世皆富  
壽而文雍睦如萬石君家然則無忝於祖若父者正不  
待求之躬行之外也宗魯信士予信其言之信故為陳  
君銘銘曰

世爵世祿或祇為辱世德如陳不貴亦足

吳文正集卷八十七

欽定四庫全書

吳文正集卷八十八

元 吳澄 撰

行狀

大元故御史中丞贈資善大夫上護軍彭城郡  
劉忠憲公行狀

公諱宣字伯宜其先潞人也因出戍留居忻之忻口鎮  
金末辟地于陝歲癸巳七月生于寓舍國朝既得河南

地復歸忻後徙太原公沈毅清介自幼嗜書長達時宜志在經濟居家奉親恭恪婉愉事無巨細必待稟命意有不可罔敢直遂毋嘗嬰疾不寢踰月疾愈乃已兄弟雍睦禮如賓友孝弟純篤名聞遠邇宣撫行部聽公談論深蒙器重還朝以公為薦擢充中書省掾在京從許文正公學每退食就師講明經理考滿除河北河南道巡行勸農副使至元十二年除戶部郎中改行省郎中從丞相伯顏平章阿珠統軍平江南自武昌順流抵鎮

江取瓜洲立行省供給軍須靡有缺乏禁止殺掠撫安  
新附所過州郡按堵如故凡便益之事多出贊畫以丞  
相命赴闕進捷書世祖皇帝親問南征事勢應對稱旨  
賜罷服寵嘉之江南既平作詩百韻鋪張偉績宋臣有  
能死節守義者必加歎獎同陳右丞沙汰江淮冗官存  
革悉合公論知松江府未幾同知浙西宣慰司事居官  
五年威惠並著陞江淮行省參議改江西湖東道提刑  
按察使貪吏豪民間風屏息一道肅然二十二年入為

禮部尚書遷吏部將征交趾公上言曰連年日本之役  
百姓愁戚官府擾攘今春停罷江浙軍民歡聲如雷夫  
安南小邦臣事有年歲貢未嘗愆期邇帥生事興兵因  
彼避竄海島使大舉無功將帥傷殘今又下令再征聞  
者莫不恐懼自古興兵必順天時中原平土猶避盛夏  
交廣炎瘴之地毒氣害人甚於兵刃今以七八月會諸  
道兵于靜江比至安南病死必衆緩急遇敵何以應之  
又交趾無糧水路難通無車馬牛畜馱載不免陸運一

夫擔五斗往還自食外官得其半若十萬石用四十萬人止可供三月軍糧搬運船料軍湏豈止通用五六十萬衆廣西湖南調度頻數民多離散戶戶供給役亦不能辦況湖廣密邇溪洞寇盜常多萬一無人伺隙大兵一出乘虛生事雖有留後人馬疲弱衰老卒難應變何不與彼中軍官深知事體者論量萬全方略不然復蹈前轍又將再征日本公上言曰近議復置征東行省再興日本之師此役不息安危繫焉至元初年高麗趙開

建言通日本以窺宋數輩奉使竟無成約率只征伐亦不收功驅有用兵民取無用地土猶珠彈雀已為失策平宋之後姦回擅權賣官鬻爵江南郡縣布滿貪饕剝官民既而要功生事之臣倡言東征輕用其謀於江淮兩浙剝造海船斫伐寺觀墳園樹木殆盡每株大木不下三二百人拖拽踰山越嶺近者百里方到船塢民間費用過於木價十倍夫匠死傷不可殫紀造作軍器衣甲百色物料皆出於民當役稅戶多致破產大兵既

達海岸不交一矢風浪損舡委十餘萬於荒山不為敵  
殺則為餓莩可為哀痛死事之家殊無優恤主將僅以  
身免朝廷寬宥使輸錢贖罪天下知刑賞不行何以懲  
勸使人效死十九年冬四處行省督諸路造膠河糧舡  
一千隻又相繼於江南平濤造東征海舡江南擾動過  
於向來其平濤船料油竹棕籐取於南方綱運絡繹工  
匠牛畜死者相望幸蒙停息百姓瘡痍未繇軍家老稚  
哭者未已又議大舉恐民不堪漢軍自圍襄陽渡江征

二王戍閩廣攻占城破交趾死損甚衆及有絕丁破產之家江南諸路守城把渡巡邏送倉庫占役之外調用常是不敷南方新附舊軍十餘年間老病逃亡出征損折向來精銳於海東新招軍數皆非習武藝慣爭戰陣之人用此制敵必然敗事經營南方用兵四十餘年中國幾致疲乏歸附以來民失撫字實非心服但畏兵力而已江淮輕剽陸梁之徒潛伏山海孰謂無之伺我兵力虛耗一旦嘯聚驅輕生無藉衆民所在殺掠其鎮

守官軍

缺

議設科取士之法二十

三年十二月中書傳旨議更鈔鑄錢公獻議曰原交鈔所起漢周以來皆未嘗有宋紹興初軍餉不繼造此以誘商旅為公邊糴買之計比銅錢易於賫擎民甚便之稍有滯礙即用見錢尚存古人子母相權之意日增月益其法浸弊自一界二界至十九界關子計江左立國百五十年是不及八年一更也亡金行用會子亦由此數變名同如小十貫大十貫通天寶會之類隨行隨壞大元初年法度未一諸路各行交銀或同見鈔或同絲

絹中統建元王以道執政盡罷諸路交鈔印造中統元寶以錢為準每鈔貳貫倒白銀壹兩十五貫倒赤金壹兩稍有壅滯出銀收鈔恐民疑惑隨路椿積元本金銀分文不動當時支出無本寶鈔未多易為權治諸老講究扶持日夜戰兢如捧破釜惟恐失墜行之十七八年鈔法無少低昂後阿合馬專政不究公私利病出納多寡每一支貼至有十餘萬定者又將隨路平準庫金銀盡數起來大都以要功能是以大失民信鈔法日虛每

歲支遣又踰向來民所行皆無本之鈔以至物價騰踊  
奚止十倍極治之法不過住印貫鈔只印小鈔發去諸  
庫倒換昏爛以便民間瓜貼驗元起鈔本金銀發去以  
安民心嚴禁權豪官吏冒名入庫倒買國用當度其所  
入量其所出如周歲差稅課程可得一百萬錠其歲支  
只可五七十萬多餘舊鈔立便燒燬如此行之不出十  
年縱不復舊物價可減今日之半欲求目前速效未見  
良策新鈔必欲創造用權舊鈔只是改換名同無金銀

作本稱提軍國支用不復抑損三數年後亦如元寶矣  
宋金之弊足為殷鑒鑄造銅錢又當詳究秦漢隋唐金  
宋歷代利病在諸史通典不待縷陳國朝廢鈔已久一  
旦行之功貲若為遠計利民權物其要自不妄用始若  
欲濟溪壑之用非惟鑄造不數抑亦不久自弊屬姦邪  
謀奪中書之務立尚書省以專國柄錢議雖罷二十四  
年遂行至元新鈔未及期年已覺滯澁權姦以行省奉  
行不嚴繩之以刑遣公及兵部郎中趙孟頫斷江淮行

省官吏罪時有元惡寔長一省公顧惜大體略不攬摭而去二十五年公由集賢學士除御史中丞行御史臺事其元惡悍戾縱恣常慮憲官糾其非若公尤所忌者猶以前時常獲款接因幸公之過揚冀一相見叙情好如舊而公以臺官不當外交竟絕江赴臺於是增其猜怨公領臺事之後大夫與右中丞出建康城外點視軍船羣御史從有以軍船載輦者御史張諒究詰知行省所使詣揚州覈實元惡盛怒即圖報復大夫之父官于屬

卽旋被按劾遣其惡黨造建康偵臺中違失出惡聲相  
躡轢臺中悚懼陰往懇祈以自解惟公巍立不動元惡  
怨公愈深羅織公之子繫揚州獄又令建康酒務淘金  
等官及遭斷錄事司官誣告行臺沮壞錢糧以聞于朝  
納賂權姦必欲置公死地當時專以財利一事為重又  
且素惡臺憲差官二員至行省鞠問公及御史六人俱  
就逮公將行書後事緘付從子自誠令勿啓視公既登  
舟行省差軍船監押兩岸列兵衛驅迫鉦鼓旌旗震耀

數里聽者觀者為之駭怖比至揚州南關簇兵圍繞不  
得入城同行御史分異各處不通往來九月朔公自裁  
於舟中啟視公所書絕筆其辭云觸怒大臣誣構成罪  
豈能與經斷小人交口辯訟屈膝苟容於怨家之前身  
為臺臣義不受辱當自引決但以不獲以身殉國為恨  
嗚呼蒼天寔鑒此心且別有公文言元惡罪狀後得其  
藁塗注鈎鈐辭句難辯前治書霍肅為序次其文讀之  
令人悲惋霍肅曰公既殺身行省白朝堂曰省知罪重

自割身死前後構禍主謀者卽中某也某為行省員外  
卽時公為參議相得甚驩為江淮鈔法法尚書省命公  
罰某杖罪公以同僚為荷其事由是公被罰某素受公  
恩但以同惡相濟深忌正人銳意擠傾曾不顧公議之  
可畏宿恩之難負公忠義節操世所共知識與不識皆  
為嗟悼肅親見親聞其事故辭覈而情哀在先有觀天  
文者謂熒惑犯外執法及是聞公有變乃知正人生死  
上應天象公哀問至太原夫人李氏將一僕一驢行三

千里奉柩歸葬其後同謀害公者不久俱死若有陰譴云元惡既斃越一年權姦亦誅改絃更張霍肅具公死事始末呈之臺省不報公之官初階承直轉大夫歷奉訓奉直朝列中順少中太中嘉議通議凡九階延祐四年從子自持上公行寔御史臺奏聞制贈資善大夫御史中丞上護軍追封彭城郡公謚忠獻夫人李氏追封彭城郡夫人謚議曰廉方公正曰忠行善可紀曰憲公性至孝鄉閭著聞見知實文貞公門無私謁政有惠慈

奏牘本乎公正非拘儒曲士引據高遠不達權宜者比  
其行善可紀信矣江淮省臣貪虐不法公以其罪上語  
泄馳賄中外柄臣黨惡誅鋤忠良傳檄加覈公慮身辱  
徒損臺威中道以殞時論寃之其廉方公正又信矣予  
嘗論公之死曰耳目重臣無辜而被逮問浮雲蔽日如  
此豈善類可望生全之時即使公不死忍恥以對獄吏  
奚啻色理辭令之辱假而得生亦臧獲婢妾苟免者所  
為耳若公臨絕之音豈不毅然大丈夫哉人孰不惡死

不曰所惡有甚於死乎此公之所以寧死而不辱也公之大父津不仕大母苗氏父訓金朝河南省掾博學知名與太原元好問友母宋氏夫人李氏清苦持家與公同其志操後公二十七年卒子男二自勉受蔭同知滁州繼尹上蔡臨潁二縣自得主杞縣簿女三婿張維梁中立母琪孫男伍女四公行完於身才周於世剛正公廉視古之名臣可以無愧宜有傳在國史故叙公平生大概以俟它日采擇謹狀

吳文正集卷八十八

欽定四庫全書

吳文正集卷八十九

元 吳澄 撰

祭文

國子學告揭大成新扁文

維京師立先聖廟既落成之二年今天子嗣位乃加封  
大成之號恭惟先聖道德高厚與天地參為萬世帝者  
師聖君賢相於位號廟祠務致崇極以風四方廟之堂

曰大成之殿廟之門曰大成之門雖因前代之舊然大成二字寔今天子所錫扁以斯名施之於今尤為宜稱吉日辰良爰揭新扁于殿之前門之外俾尊慕先聖入其門升其堂者得所瞻仰焉謹以潔牲醴齊用伸虔告王其鑒之

祭周元公濂溪先生墓文

嗚呼悟道有初適道有途先生之圖先生之書昭示厥初維精匪粗坦闢厥途維約匪紆人生而靜所性天性

物感而動所用天用未量布帛分寸在度未程重輕銖  
兩在衡風雖過河水弗興波形雖對鏡鏡弗藏影動而  
凝然靜而粲然唯一故直唯一故專道響絕絃千數百  
年學要一言洙泗真傳有性無欲有一無二猗嗟效聃  
久莫克至先生之道萬世杲杲展拜墓前如親見焉廬  
山峙南大江流北仰之彌高逝者不息

慈湖丁蘭廟祝文

歲在丁亥十月丙寅前鄉貢進士江西撫州吳澄謹昭

告於丁候大神澄自少讀書粗識義理見有厚於人倫者雖不同世心慕其人惟候事親不失子道澄去冬經過式瞻廟貌疇昔之夜夢祇見于候執紙幣以贄歸舟泊祠下敬惟往夢是踐澄去家期年今歸省母舟沂流而上祈得順風而無驚虞以早達於家神其保佑之

祭樂安縣丞黃從事文

嗚呼公生於梁長於梁老於揚卒於揚其質厚其氣剛其見定其行方始也辟地出蜀而遊終也辟世入山而

幽出蜀伊何崎嶇萬里潔身以去就祿而仕入山伊何  
優游卒歲儉約以處得正以斃辟地以生陳子之清辟  
世以死張子之寧清則雖生而不辱寧則雖死而猶榮  
初予識公于通守之庭聞公為當代鉅人所敬聽其言  
論風旨於是而信公之名既而從公於貳令之聽見公  
為一邑士民所愛視其兩事設施於是而得公之誠曾  
幾何時風震雨凌公於斯時蟣蝨小官蹇蹇于下事不  
辭難又幾何時地陷天傾公於斯時螻蟻微軀行行于

中義不受汙嗚呼平居無事凡百有位銜才華矜科第  
挾崇高夸寵利憑跋萬民傲睨舉世及至一旦茫無寸  
計臨難苟免從風披靡自詭龍蛇不愧犬豕胡為乎寒  
松勁草之心乃見於下邑庶僚之底如公之志有隕無  
貳如公之節霜嚴日厲人知公禍福不動為一時之勇  
孰知公完養有素非一朝之故公之劬書嗜學寒暑不  
廢每蹙然於芳草之艾蕭公之安貧守賤表裏一致常  
怡然於陋巷之簞瓢公之好賢樂善心口嘆喟恨不即

上之青霄公之憤世嫉邪辭色峻厲恨不即肆之市朝  
逮祈死之不得慨偷生之不聊爰投迹於魑魅任爭席  
於牧樵憂患之端殆無時而不有勁直之氣不與累而  
俱消外無撓而力毅內有主而神全惟其所稟之異所  
學之正是以雖老益壯雖窮益堅聖人未見剛者如公  
蓋庶幾焉嗚呼知公惟予知予惟公今其逝矣欲見何  
從有山崇崇有水溶溶今其藏矣哀慟何窮冥冥潛德  
凜凜高風一觴永訣尚鑒予衷

祭吳叔震文

嗚呼人莫不有死兄未可以死也外無彊支內未有壯子也一家憂責之所萃一邑民望之所係也兄慮事兮素周胡能一一預擬也兄養生兮素厚胡寧忽忽至此也嗚呼以兄風流文雅之懿溫公謙遜之美不惟見稱於平居遠近之交親抑亦見重於當路貴顯之君子蓋其久而不渝行之安而無偽故兄之感動乎人者有由而人之愛敬於兄者無異吾求一人彷彿如兄者焉幾

聞郡而莫之可比知與不知聞兄之死疇不嗟悼而失聲痛惜而隕涕嗚呼兄今已矣吾自丙戌與兄交際知無不言言無或避于今八年首末無二今夏吾疾兄念之至兄疾數月吾不謹視初期兄之有瘳豈料竟此而長逝負于幽冥抱恨積媿嗚呼昔兄於吾孰不籌議今吾於兄寧敢遺墜命之短長家之隆替諒天數之有定匪人力之可計寤寐以思永嘆弗置一觴告靈尚鑒吾意無以報兄空洒哀淚嗚呼

祭危先生文

嗚呼昔予弱歲初識先生端方之質敦篤于行曰在程門可幾彥明事徽庵翁雖壻猶子翁既無後悉意經紀嫁其孫女與子一視翁之同宗既貴既豐尊禮先生靡替有崇館置于塾十誥九從予時往來每見益親學不衰倦知識日新沉潛邃密閭閻恂恂下逮末術烏伸熊經亦所深嗜以衛其生嗚呼先生宜享遐齡如何如何一疾弗救年踰七十豈不謂壽宿學彫落予心寔疚聞

訃之初身寄逆旅絕學如綫予復誰語幾更旬朔始拜  
柩前魂兮何之涕泗漣漣嗚呼

祭外舅余東齋先生文

嗚呼翁年六十有七未至於耄且耄也翁之精神志氣  
未至於昏且耗也翁之起居飲食未減於壯且少也去  
夏得疾其端甚微人莫之告澄莫之知逮乎有聞凜乎  
有疑秋杪澄始徃省專付之醫而醫曰可為也去冬力  
疾其出豈宜藥莫或繼病莫或支雀鼠櫻懷風雪侵肌

歲杪澄又徃省重責之醫而醫曰未危也正月于役數月于違意翁介疾有喜可必其期也孰謂凶訃遽馳竟至於斯也嗚呼翁之意度翁之文詞篤志好學老而弗衰炳炳于中寂寂于施表表于鄉昧昧于時是則大運所同而非獨翁一身之私也舉世所慨而非獨澄一人之所悲也澄寔無似翁妻以子翁今已矣莫之起矣疾弗躬侍喪弗躬事奄忽再朔始拜靈几疾首痛心有淚如洗嗚呼死者其有覺乎翁其能如昨乎死者其可作

乎翁其將焉託乎嗚呼哀哉尚享

祭張達善文

猗歟朱子訓釋四書微辭密意日星炳如紛紛末學經  
笥文藻而於本原或昧探討卓哉張君學有正傳章句  
義理究索精專講說鋪陳敷暢厥旨抑揚翕張聳動羣  
耳公侯之門賓師之尊始終情義彌久彌敦晚官魯洙  
又客衛服說說游從濟濟受讀歸來淮土妙運誨規有  
言于朝將升胃闡如何如何天不壽之忽此棄遺曾未

耆老昔遊白下及上君堂今滯儀鑒君喪已祥遥瞻蜀  
岡墓長宿草進拜遺像涕隕心慄學之不墜允也不忘  
愴焉一奠以寓哀傷尚享

祭鄒居士文

嗚呼予觀聖門之論君子懷德懷刑二端而已其懷德  
也於處善循理秉義守禮所樂所喜勉勉操履如嗜甘  
美其懷刑也於傾險譎詭放僻邪侈所畏所恥惴惴謹  
避如蹈火水維此二端夫孰能然求諸今之人居士公

有焉故公之在世也七十二年不尤於人不愧於天內  
有懿行外無瑕愆予之迂踈衆所共愚締交之初一見  
心孚蓋嘗與予夜半不寐靡所不談靡所不議忘倦忘  
疲深悅深契忽然興喟曰惟我與爾使居今世人人若  
是則官府可廢法禁可弛追思是時予年二十四今又  
三十四年矣公乃棄予而死嗚呼已矣予復奚言惟上  
存淺土之喪下闕承家之孫此公之生而不置懷於朝  
夕死亦不瞑目於九原也雖然天者不可知人者猶可

期予當告公之子以卒公志以滿公意公亦可以脩然  
長逝而無芥蒂於斯烏乎哀哉尚享

祭祝靜得提舉文

猗嗟夫君如瑜如珣如蘭如芝如鳳如麟初賓淮甸繼  
宦江濱所至所歷與物為春吾聞其風未見其人拙疎  
繆悠垂老乃仕與君交承自覺形穢南還一年爰始通  
使西遊數月音問莫嗣道中訃傳疑駭驚悸公牘促行  
遽信其然發書旅次汗淚交漣惻愴未已次且不前緘

辭絮酒亟奠几筵悵悵目送秋水長天尚享

祭袁主一文

嗚呼吾兄遽至是邪與兄同里情同一家後締姻親交  
誼逾密合如符契固若膠漆予之中子兄之愛婿年未  
三十不幸天逝予罹此凶兄寔不愉曾未再期兄亦棄  
予予留京師聞訃哀怛望門一慟情莫能達數千里外  
緘此哀辭辭促意長泣涕漣漣

祭沙卜珠宣慰文

嗚呼已酉之夏予如京師於廣陵之寓府話六載之別  
離公云去冬一病幾不可起幸今少瘳得再相見于此  
予覲公體貌雖羸視聽不衰意或日就於平復而年壽  
未可涯也予去魯幾何時公厭世而若遺二千里外凶  
計莫知久乃聞之惻愴不怡遣使弔問爰足以聲中懷  
之悲日月不淹忽焉四期予始南還而公不復見感傷  
嘆惋盖有甚於初聞之期維公超超特異之姿恢恢大  
受之器富而好禮貴而下士四海名勝之所願從而知

與不知之所共美雖以疾廢而歸居庶乎久生以觀斯  
世之何如爾烏乎公其已矣而有賢嗣則公之死猶不  
死也宿草芊綿晨露晚烟一觴敬酹烏乎安得起公於  
九原

祭夏幼安文

嗚呼以吾友朋明悟之質和粹之氣深沉之量重厚之  
器宜其得於天者既豐且備胡為嗇於壽而不假之以  
年歲也烏乎吾友卓爾殊異齊諸輩儔寡所匹儷方其

少也於親孝敬於長順悌恪共子職克承考志如于越  
之劒匣藏未試炳炳輝輝微見鋒銳及其長也父喪既  
畢家業益熾田疇廣闢積貯贏利如源泉之水春流方  
至汨汨滔滔莫測涯涘其壯而學也脫略凡近超絕造  
詣忘筌蹄於章句探奧突於理義未嘗執筆求工於文  
辭未嘗挾冊求多於誦記而施於今者粲然可觀而師  
於古者昭若冥契其彊而仕也觀天光於上國覲日角  
於潛邸攀龍附鳳於翕欬化鯉為鵬於尺咫由布衣而

七品出玉音之特旨時宰下禮於其廬貴游願交者如  
市騰蹊蹊於北方冠總總之南士彼商財而計資率面  
頰而頰泚烏乎吾友衆美攸萃言溫雅而中倫容安詳  
而合軌聞者稱揚見者嘆喟烏乎吾友而止於是予於  
今春移疾去位吾友南還同舟共濟予於江干數月淹  
滯吾友前邁旋即官次比予及家秋聿云季吾友謁告  
自官來悲微恙遽感良藥亦瘳日望其痊豈意長逝病  
弗及問歛弗及視去者日遠來者日駛衮衮劇痛洒洒

哀淚烏乎吾友竟至於此命也奈何奚怨奚懟賢母有  
命俾淑而嗣疇昔交情罔間生死有不盡心幽顯負媿  
一酌几筵尚鑒予意

祭董平章文

自聞公喪亦既逾年始得致清酌庶饘之奠于公之祠  
前唯公堅剛之質勁直之氣廉正之操果毅之才如金  
百鍊不可少摧如矢一發不可少回如喬岳之崔嵬如  
洪流之磅礴見義必為不顧身之利害而移見賢必敬

不因人之毀譽而疑其嫉惡也如仇其好善也如飴勲  
閭巍巍而恂恂文儒之設施英邁堂堂而循循理法之  
繩規蓋其稟於天者既異而其得於學者又足以栽培  
滋溉而有所裨故能特立獨行表表於天下而視世之  
依阿渙浚閹然取媚者亦清泉湜湜之不滓於汙泥某  
也山澤之癯羈孤之迹分甘肥遯於明時未識公面已  
辱公知居常惴惴慄慄惟恐負公之識鑒庶幾沒齒而  
無忸怩豈意後公以死猶及聞公之訃而興悲烏乎公


之光昭卓偉不可得而見矣相望數千里之遠僅能寄  
一哀於此辭尚饗

華蓋山禱雨文

代申宰作

予之不才濫叨邑宰智識蒙陋牧字乖僻獲咎于天  
降之罰連月不雨早稻已損晚稻亦傷徧走羣望未遂  
感應竊惟守土之官有罪神宜譴責於其躬百里之民  
何罪焉而罹此禍今正艱食若更不雨無望秋成民必  
享死神之仁慈豈忍使斯民至於此極油然作雲沛然

下雨在神瞬息間爾其注甘霖以甦苦旱以活斯民之  
命惟神其憐之謹告



吳文正集卷八十九